

# فانطازيا

احمد سعيد

الطبعة  
13



بما أن هذه أول تجربه لي في النشر فيجب أن اقدم الشكر  
(زى الكتاب المشاهير و كده)

شكر لايد منه  
شكراً لكل من ساعدنى  
شكراً لحبيبتى و توأم روى  
شكراً لوالدتى و أختى  
شكراً لأصدقائى

ملحوظه: محدش ساعدنى فى أى حاجه

# مكنة الزمن

(٠)

فكره مجنونه

كنت أسير بغير هدى، أفكر بكل طرق الأنتحار ثم أراجع  
مستغفراً، ثم أفكر فى قتل زوجتى المستفذه، ثم أراجع  
مستغفراً، أفكر فى حرق ورشة عم أحمد الموجوده أسفل  
منزلى لأنه يمنعنى من النوم يومياً، ثم أراجع مستغفراً، ثم  
برقت فى ذهنى فكره، لما لا أختفى من الدنيا، طبعاً تسأل  
كيف، أسافر عبر الزمن و أمنع والدى من الزواج من أمى،  
و لكن طبعاً السفر عبر الزمن ليس متاح فى زمنى، الا أن  
هناك أمل واحد هو الدكتور لاشين، الدكتور هشام لاشين  
أخترع آلة الزمن، إلا أن الحكومه إستولت على الآله لمنع  
وقوعها فى أيادى إجراميه، إلا أن الدكتور لاشين نفسه وقع  
فى الأيادى الإجراميه، فقد أختطف من قبل مجهولين، وتعدد  
الاقاويل عن هوية مختطفيه، البعض قال جهاز مخابرات  
مُعادى، و آخرون قالوا جماعات المعارضه، إلا أنى أنا  
أكتشفت أين هو، منذ أسبوع و أنا جالس على المقهى مع  
أصدقائى، سمعت أحد (الجرابيع) يتحدث إلى آخر عن أن  
المعلم سعيد قدره هو من أختطفه، و أجبره على أن يصنع آله  
أخرى و يخفيها فى مكان ما فى التجمع، إذن سوف أصل إلى  
سعيد قدره و أطلب منه السفر لعام زواج والدى و أمنعهم من  
الزواج.

(١)

د/لاشين

أستيقظت منتعش هذا الصباح، يبدو أن هذا الصباح مناسب لعمل الكثير من الأشياء، إلا أنني قررت أن أفعل شئ واحد، بعد أن أغتسلت و أرتديت ملابسى التهمت شطيرة الجبن الأبيض، و غادرت المنزل إلى حيث أنا متجهه، أستقليت أول ميكروباص إلى التجمع الخامس، بعد أن ترجلت من الميكروباص تمشيت قليلاً حتى وصلت إلى فيلا تبدو قديمه، بعض طرقات على البوابه الحديدية الكبيره ثم أطل أحدهم براسه من فتحه فى الباب الحديدى، يبدو من ملامحه (و العياذ بالله) ما يثير الراحه فى نفسك بشكل غريب، و بصوت أجش أشبه بصوت الحمير قال: عايز مين يا أخينا.

تتحنحت و جاوبته و حاولت أن تكون طريقتى مثيره: الدود فالعمود.

فجاء رده و هو يفتح الباب: و العمود مدود.

و أشار لى أن أدخل ثم أغلق الباب و تقدمنى إلى داخل الفيلا، ثم هبطنا إلى البدروم حيث تجمع خمسة بغال وديعه كمن فتح لى الباب و معهم رجل يبدو مرعوب يرتدى معطف أبيض كأنه دكتور، تقدم أحد البغال و خاطبنى بصوت يشبه الثور: أهلا يا باشا محسوبك سعيد قدره و الى هناك ده هشام لاشين بتاع مكنة الزمن لامؤخذه.

بادلته التحيه و سألت: و هسافر أنهارده؟

رد قدره بصوته البشع: أه طبعاً يا بيه هو بس عم لاشين بيضبط المكنه و شويه حبشتكناات تانيه كده هههههههه.

فضحكت باقى بغاله على كلامه السخيف، فنظرت له كأنى  
أبتلعت ليمونه مره و أبتسمت أبتسامه صفراء، ثم تقدمت إلى  
الدكتور لاشين و خاطبته: أزيك يا دكتور عامل أيه.

فنظر لى بنظرة (أنت عبيط يلا)، فأبتعلت كلماتى و وقفت  
جانباً فى هدوء حتى ينتهى، بعد مده من الوقت أشار الدكتور  
لهم أن إنتهى، فقال قدره: يلا يا أستاذ علشان تسافر.  
فأكد: هتسفرونى فى الميعاد و المكان الى حدده صح.

فرد قدره بنفاد صبر: عيب يا بيه زى ما أتفقنا بظبط يلا  
علشان ورانا أشغال تانيه بقى.

طبعاً أنا أتأكد لانى دفعت مرتب خمس سنوات و خططت أن  
أذهب إلى مكان و زمان محدد حتى أمتع أبى من الزواج من  
أمى لكى لا أولد، تستعجب و تقول أنى جُننت نعم أنا جُننت  
و أطلقت العنان لجنونى و سوف أفعل، سوف أعود إلى عام  
١٩٨٦ يوم ٢٠ فبراير فى الجيزه و سأقضى أسبوع فى  
الماضى حتى أمتع أبى من التقدم لخطبتها يوم ٢٧ فبراير، و  
جهزت مجموعه عملات قديمه لأتمكن من العيش فى  
الماضى، ترى هل أنجح؟

(٢)

## الحاج أبو الشهامه

دخلت مكنه... عفواً آلة الزمن للبدا في الرحله، مررت بأحاساس من دخل الخلاط مع بعض قطع الطماطم، أنتهيت من الخلاط لأجد نفسى فى الجيزه قرب منزل والدى إلا أن المكان يبدو نفس المكان الحالى، ثوانى و عبرت بجانبى حافلة النقل العام ذات الالوان الحمراء و البيضاء، الآن بالفعل أنا فى الثمانينات، أسرعت إلى منزل أبى فأنا أعرف أنه يخرج إلى عمله فى مثل هذا الوقت، سوف أتبعه لأعرف ماذا يفعل و ربما أعرف كيف أمنعه من الزواج من أمى، بالفعل ها هو المرحوم أبويا ولكن يبدو أصغر بحوالى خمسہ و عشرون عاماً، أتبعه إلى محطة الحافلات، وقفنا فى انتظار الحافله، كنت أنظر (متنح) لأبى و أتمنى أن أسلم عليه و أقوله "عامل أیه يا حاج ليك وحشه"، طبعاً منعت نفسى فلا يجب أن يعرف من أنا و إلا أكتشف ما أخطط له، ركب أبى الحافله و لحقت به، أتى بائع التذاكر (الكمسرى) و طلب ثمن التذکره، مددت يدى فى جيبي لأخرج المحفظه و لكن: فين المحفظه ... المحفظه كانت فجيبى.

الكمسرى: بقولك أیه بطلوا حركات النصب دى يا تقطع تذكره يأما هنزلك.

تتدخل بعض الركاب لتهدئة الكمسرى وقتها قفز أحدهم من الحافله و هى تسير، فقال أحد الركاب: يعوض عليك ربنا يا أبنى ده شكله نشال.

نظرت لهم بنظرة (مش فاهم حاجه خالص): نشال يعنى أیه.

رجل كبير تطوع ليفهمنى: نشال... عمرك ما سمعت عن  
نشال... حرامى سرق محفظتك.

هنا تدخل أبى لإنها هذا الحوار و دفع ثمن تذكره لى،  
"أبوالشهامه كلها والله يا حاج" كدت أقولها إلا أننى شكرته  
وأكتفيت، وصلنا إلى محطته و نزل أبى فلحقت به.

(٣)

## الحمد لله بخير

الآن لا مكان لى أذهب له بدون نقود، سوف ألبأ إلى أبى  
لأنام عنده لا حل آخر، ولكن كيف، ها هو الآن يتجهه إلى  
الشركه التى يعمل بها و أنا أتبعه، ما أن وصلنا عند البوابه  
عبرها هو بعد أن حيا فرد الأمن، فكرت ماذا أفعل فصحت  
محاولاً لفت نظره: بقولك ياأخينا متعرفش الاستاذ يوسف  
حلمى الى شغال هنا.

فنظر أبى خلفه بعد أن تنبه لذكر أسمه، رد فرد الامن:  
الأستاذ لسه داخل (منادياً على أبى) يا أستاذ يوسف يا أستاذ  
يوسف فى واحد ببسال عليك.

جاء أبى و ينظر لى: مش انت الى أنتشلت فى الأتوبيس...  
عايز أيه يا ريس.

حاولت أن أدعى أنى صعيدى فبدأت أقلد لهجة أحمد  
عبدالعزيز فى ذئاب الجبل: كيف حالك يا ولد العم أنت ما  
هتعرفنيش ولا أيه.

نظر أبى لى محاولاً التذكر: لا والله مش واخذ بالى مين.  
فوراً اخترعت كذبه: أنا حسين ابن أبوك الحاج جعفر ابن عم  
أبوك.

نظر لى أبى نظره تعجب، هنا تذكرت أن أبى حدث بينه و  
بين بعض أقاربه مشاكل و خاصةً الحاج جعفر و لكنى لا  
أذكر قبل أن يخطب أمى أم بعدها، يبدو أنى قد خربت  
العملية كلها، رفع أبى يده و ظننت أنه سوف يلكنى فى



وجهى لكنه خبط على كتفى محيياً: كبرت يا حسين أزيك و  
أزى أبويا الحاج جعفر.

أخيراً أحساس (هيببيبيبيح) و الأطمئنان و بأبتسامه عريضه:  
الحمد لله بخير.

أبى: طب تعالى نقعد فمكتبى و نتكلم.

أدخلنى و (هرانى) أسأله من نوع (أزى الحاج و الحاجه،  
أزى فلان و أزى علان، و أزى أمه لا إله إلا الله) و الحمد  
لله كلها أجوبتها: الحمد لله بخير، ثم سأل عن أشياء لا أعرفها  
و لن أعرفها مطلقاً إلا إذا كنت ابن أبوكم الحاج جعفر فعلاً،  
فراوغته و طلبت منه عمل و مكان مؤقت للسكن فهو يعرف  
أن محفظتى سُرقت و حدث هذا أمامه، و وافق على أن  
يبحث لى عن عمل و سوف أسكن فى نفس منزله فى  
البدروم، تم الجزء الأول من الخطه و وصلت إلى أبى و  
الباقى أن أجد أمى.

(٤)

مدد يا قناوى مدد

بعد يومين الحقنى أبى بالعمل فى الشركه فى وظيفة عامل فى المصنع، أعرف أن أمى تعمل فى الحسابات، كيف أصل إلى حاجه، و لم أجد فكره لأبعاده عنها بعد، بالصدفه قابلت أمى و هى فى طريقها إلى مبنى الأداره، أمى و لكن أصغر بحوالى خمس و عشرون عاماً (أيه الحلاوه دى يا حاجه والله الحاج كان عنده حق) طبعاً لم أقل هذا بل كله فى ذهنى، بدأت أفكر كيف أجعله يبتعد عنها و هى جميله و ذات خلق، لا أجد بها عيوب لأثنيه عن الزواج منها، إلا أننى وجدت فكره هى أن أقنعه بالزواج من أخرى و تكون أيضاً جميله و ذات خلق، فى الليل كنا نجلس فى المقهى أخذت أحدثه: أيه يا يوسف ما هنفرحش بيك بجى.

أبى: قريب أن شاء الله.

العيب الآن على خطتى: أنت شوفت بت الحاج عثمان الى فوجكم.

أبى: سعاد دى زى أختى الصغيره.

ماذا أفعل معه قد قطع على الطريق، إلا أننى تذكرت شئ سيفيدنى حتماً: عارف يا يوسف انا جايلك ليه.

أبى: كنت عايز شغل و أدينى جبتلك.

أنا: لا يا يوسف أنا بعنتى ليك سيدك عبدالرحيم الجناوى.

هلل أبى فى سعادته: الله أكبر مدد يا قناوى مدد خير.

أنا: سيدك بيجولك ماتتجوزش فاطمه و اتجوز سعاد.

هنا بُهت أبى و نظر لى بذهول: أنت عرفت منين أنى عايز  
أتجوز فاطمه.

هنا أرتسمت على شفتى أبتسامه ثقه عريضه: أنا ما عارفش  
حد ده سيدك الجناوى هو الى يعرف.

أقتنع أبى فقد كان يصدق أى شئ مرتبط بأشاره من سيدى  
عبدالرحيم القناوى، و بالطبع أنا أعرف ذلك، الآن انجزت  
مهمتى و بقى لى فى الثمانينات و الحياه عموماً اربع أيام،  
سوف أستمتع بهم و أشاهد كل ما لم يكن يمكننى رويته،  
سوف أتجول فى شوارع القاهره التى أعرفها الآن لارى  
كيف كانت تبدو سابقاً، سوف أحضر مباره الاهلى و الزمالك  
لارى نجوم مصر فى الثمانينات، و أشاهد رائعه احمد زكى  
(البرى) فى عرضه الأول فى السينما، لتكن آخر أيامى رحله  
ممتع.

(٥)

الخاتمه

اليوم هو اليوم الموعود، أخيراً سوف أختفى من هذا العالم،  
اليوم سوف يخطب أبى سعاد بنت الحاج عثمان، سوف لن  
أولد، أبى و جدتى الآن مع الحاج عثمان يتفقان على الزواج،  
مددت على سريرى، فى أنتظار الأختفاء، فجاءه... وجدت  
نفسى فى الخلاط من جديد، لأفجاء بأبنى مره أخرى فى  
زمنى، ما أن رانى سعيد قدره حتى انفجر فى الضحك هو و  
بغاله و حتى الدكتور لاشين، نظرت لهم بأستياء: بتضحكوا  
على أيه أنتم.

أشار أحدهم إلى شعرى و ردد: أنت سافرت بالزمن عشان  
تضرب شعرك أوكسوجين.

نظرت له فى أشمئزاز ثم أسرعت إلى أقرب مرأه: أيه ده.  
شعرى تغير اللون المشمشى، وقفت مذهولاً و لم أختفى و  
شعرى بقى لونه مشمشى، أستنتجت أن أبى تزوج سعاد و  
أنجبانى، هنا كدت ألعن سعاد و أب... اللهم ما اخزيك يا  
شيطان، تراجعف فهم والدى طبعاً، الأ اننى قررت أن أدخر  
ثمن سفره أخرى الى الماضى، و فى هذه المره سوف أقتل  
المرحوم أبى لكى لا أستريح.

- تمت -

# الذين رجعوا من السماء

(٠)

## هضبة الالهram

هضبة الالهramات فى الليل، الأهرامات الشامخه رمز العظمة و التاريخ يحتضنها الليل ثم صوت ضحكات خليعه تقاطع هذا المشهد: هيببيبيىء لا يا سامح عيب. سامح: عيب أيه يا شوشو أنتى مش قولتى عايزه حته هاديه مفيش أهدي من كده.

تجرى شوشو و هى تطلق صوت ضحكاتها الخليعه التى تقطع هدوء الليل و فجاه قرص معدنى مشتعل ضخم يقترب من الأرض، كلما أقترب ظهر حجمه أكبر و أكبر، ثم أرتطم بالأرض و أحدث موجه من الرمال ألقت سامح و شوشو على الأرض، مرت دقيقه قبل أن يفتح باب هذا القرص الحديدى و يخرج منه كائنات خضراء شبيهه بالبشر تحدثوا إلى بعضهم ثم نظروا إلى سامح و شوشو، تحدثت الفضائيين بلغه غريبه لم يفهمها سامح أو شوشو و نظروا لهم بنظرة بلاهه، هنا عدل أحد الفضائيين بعض أزرار قلاذته ثم نظر لهم و تحدث أكثر من مره بلغات عديده و لم يفهوا حتى قال: انت عارفين الفرعون.

نظر له سامح و تحدث و هو يتقلقل: أن... أن... أنتم مين؟ و عايزين أيه مننا؟

تحدث الفضائي روگش: أحنا مبعوثين من كوكب بلوتو  
بندور على أى حد من رجال الفرعون أو أى حد من أفراد  
بعثتنا العلميه.

سامح: أنا مش فاهم حاجه خالص... قول بقى تانى بس  
بالعربى بقى.

شوشو و هى ترتجف: دول شبهه فيلم أجنبى لا يكونوا  
فضائيين.

نظر لها الفضائي كدز بنفاز صبر: أيوه أحنا فضائيين  
متضيعوش وقتنا فين رجال الفرعون.

سامح: يا بيه و ربنا ما فهمين حاجه من كلامك.

هنا نفذ صبر الفضائي كدز: أنتم الى أجبرتوني على ده.

أخرج الفضائي من جيبه مسدس غريب الشكل و وجهه إلى  
سامح و شوشو و هم يصرخون و ضغط الزناد ليسكتهم.

(١)

## الاجبياء

سامح و شوشو ممدادين على سريرين و مربوطين بأجهزه غريبه، يتحرك كدز نحوهم و بدا فى الضغط على أزرار الجهاز لتظهر على الشاشات بعض ذكرياتهم، ينظر روگش إلى الشاشات ثم يتحدث: أيه ده أيه الذكريات الغريبه دى و ماليانه تفهات غير مفهومه و أفكار جنسيه قدره الظاهر انهم من قوم همج و من عبيد الفرعوان.

كدز: شكلهم مجرد أجبيا لکن أنا شايف بعض الاجهزه المتقدمه مكانتش موجوده فى زيارتنا الاولى.

روگش: أه فعلا حقيقى فى سيارات و أجهزه عرض و حاسبات آليه اظاهر أن بعثتنا العلميه ساعدتهم جداً.

كدز: أشك فى ذلك، أنا مش شايف أى حاجه عن علمائنا.

روگش: و الغريب بردو أنى من شايف أى حاجه عن الفرعون.

كدز: و الغريب كمان أن أجهزتنا التقطت أشارات اتصالات كثيره شكلهم طوروا أجهزه اتصالاتهم.

روگش: و أشارات أجهزه بعثتنا؟

كدز: ظاهره على الخريطه فى مكان قريب من هنا طبقاً لمسمياتهم أسمه ميدان الجيزه.

روگش: و أزاى نوصل هناك.

كدز: مفيش غير الأجبيا دول صحيحهم علشان نتحرك.

روگش محاولاً إيقاظ شوشو و سامح: أصحاب.  
شوشو: ياما سبيني أنام شويه كمان.  
طااااخ، كدز يصفع شوشو على وجهها: أمك مين يا بنت  
العبيطه.  
شوشو مفزوعه: لامؤخذه يا باشا صحيت أهوه.  
و يستيقظ سامح على صوت الصفعه: أنا صحيت يا باشا من  
غير ضرب.  
كدز: دلوقتي هترشدونا لمكان أسمه ميدان الجيزه.  
سامح: ارشدكم هههه أنت مباحث يا باشا وعايز تشغلني  
مرشد.  
طااااااخ صفعه آخرى من كدز: لازم نروح للمكان ده،  
هنقدر توصلنا.  
سامح و هو يتحسس قفاه: حاضر يا باشا بسيطه أفضلوا  
أوصلكوا بعربيتي.  
كدز بلهجه أمره: روگش اجمع كل الاجهزه الى هحتاجها  
يلا.  
روگش: تمام.



(٢)

آخر فيصل

سامح: باشا هتنزلوا هنا.  
روگش: أحنا لسه موصلناش.  
سامح: ما هو لامؤخذة يا باشا انا مش داخل الجيزه انا رايح  
الرمايه.  
كَدَز يصفعه على قفاه: أنت مش قولت هتوصلنا يا حيوان.  
سامح: يا باشا لو مكنتش عصبى بس، هتركبوا من هنا  
مكرو باز من الی بيقولوا جيزه هينزلکم فی الميدان.  
كَدَز يترجل من السياره و يقول بفراغ صبر: أمشى يا غبى.  
سامح يتحسس قفاه و بيتسم: سلام يا باشا طب والله  
هيوحشنى هزارك التقليل.  
شوشو: سلام يا فضائيين هيببيبيبيى.  
كَدَز ممتعض الوجه: أغبياء الارض.  
روگش مبتسم: اهدى يا كَدَز صحتك أحنا هنتعامل مع البشر  
كتيبر و بأسلوك ده هيجيلك شلل قبل ما نخلص مهمتنا.  
كَدَز بانفعال: مالکش دعوه بصحتى تعالى ورايا.  
يتحرك كَدَز و يتبعه روگش الى ان يصلوا الى سيارات  
المطلوبه، فيطلبوا من السائق ان يركبوا ينظر لهم بنظره  
متفحصه ثم يشير لهم بعينه أن اركبوا، جلسوا فى المقعد  
الآخر، و بداء الركاب يتهامسون، انطلقت السياره و قطعت

شارع الهرم الى ان وصلت السيارة عند شارع ترعه الزمر  
فسال السائق: يا الجماعه فى حد مبعثش اجره.  
رد احد الركاب: لا ياسطا الكل بعت الاجره بس الاتنين  
الخضر الى وراء دول مبعثوش.  
السائق: الاجره يا بشوات يا خضر.  
فلم يردوا فنبههم احد الركاب فرد كدز: أنت عايز ايه.  
السائق: الاجره يا بيه.  
روكش: يعنى ايه الأجره.  
السائق فى نفاذ صبر: يعنى ايه الأجره !!!، تمن ركوب  
المكروباز يا خويا.  
كدز: لا معناش فلوس ارضيه تأخذ فلوس بلوتسيه.  
السائق: أخلص يالا أنت وهو الأجره.  
كدز فى حده: أتكلم معنا بأدب أحنا ضيوف الفرعون.  
السائق فى عصبية: الفرعون أه هو يوم باين من أوله.  
أوقف السائق السيارة فجأه وترجل منها و الشرر يتطاير من  
عينييه، ودار حول السيارة ليسحب كدز من داخل السيارة،  
يحاول بعض الركاب الحول بينهما ألا أن كدز سدد لكمه  
للسائق أسالت الدماء من شفته، و كانت هذه أول و آخر لكمه  
يسددها كدز فى هذه المعركه، بعد (علقه ساخنه) لكدز و  
روكش من السائق و أصدقائه ظهر مساعد شرطه (أمين  
شرطه) أوقف المعركه و سحبهم على قسم الشرطه.

(٣)

قسم العمرانيه

داخل قسم الشرطه جلس روکش و کدز و السائق و اثنين آخرين على الأرض، و كان جميع المارين ينظرون لذوى البشره الخضراء نظرة إندهاش، حتى طلبهم الضابط، داخلوا إلى الغرفه و كان الضابط يجرى مكالمه هاتفيه ما أن إنتهى حتى ألتفت لهم فوجد الخضر، نظر لهم من أعلى إلى أسفل: الله أنتو متتكرين يا حيلتها أنت و هو و أنت يلا ضربتكم ليه. السائق: يا باشا مدفعوش الأجره و مسكو فخرناقى أقسم بالله يا باشا.

الضابط مقاطعاً: ما خلاص يا ض أنت هتمثل و أنت بقى يا حيلتها منك ليه أيه الى أنتو لابسينه ده. كدز فى عصبية: أنت الضابط المكلف هنا، أحنا فى مهمه رسميه و أنا أأمرك أنك تبلغ الفرعون. الضابط بنظرة تشكك: جميل أوى الكلام ده واضح أنه صنف على أوى أوى.

كدز فى عصبية: أنت تقصد أيه بكلامك ده؟ الضابط بأبستامة مكر: أنا هعرفك معنى كلامى ، ثم أشار بعينه للعسكري الواقف خلفهم فأنهال عليهم ضرباً حتى أشار الضابط بيده أن كُف ثم قال: ها فوقتوا ولا لسه. كدز و قد أشتعل غضباً: أنت هنتال أشد عقاب من الفرعون.

الضابط: لا كده لسه أنت لسه موقتش بيبقى تباتوا معانا لبكره  
علشان تفوقوا و نعرف نتفاهم كده خدهم ع الحجز يا  
عسكري.  
يدفع العسكري كدز و روکش و السائق إلى الحجز.

(٤)

المتخفي

المحامى بدر البوشى ، قالها رجل متوسط القامه ذو شعر  
أشيب و ملامحه تدل على الحكمة و الوقار، طلب الضابط  
إحضار الخضر من الحجز و ما أن حضروا حتى تعانق  
المحامى مع روگش، نظر الضابط لهم بتعجب و قال: أنت  
تعرف العيال دى؟

بدر: أيوه دول و لاد عمى رمزى و كمال يا باشا.

الضابط: طب و أيه الهبل الى لابسينه ده.

بدر ضاحكاً: حفله تنكريه يا باشا.

الضابط: و ينفع الى عمالوه ف...

كذز مقاطاً: أنت ميران رئيس البعته.

بدر: لاء يا سيدى أنا بؤرسك عالم الفلك.

الضابط: أهلا هو أنت كمان شارب يا عسكر....

هنا أطلق بدر من مسدس فى يده شعاع جمد الضابط فى  
مكانه، و وجه حديثه لروگش: سيدى وزير العلوم أنتظرناكم  
لمده أربعتلاف و ربيعيت سنه.

نظر له روگش فى دهشه: أحنا غبنا عنكم حوالى تمناشر  
سنه.

بؤرسك: ده بتوقيت كوكبنا أما على الكوكب ده مر أربعتلاف  
و ربيعيت سنه.

أندھش كَدَز و خبط روگش راسه بيده: آزاي محطناش ده في حسابتنا و آيه الى حصل للفرعون و المحطه العلميه عند الأهرام و باقى أفراد البعثه.

بُورسك: الفرعون أتقتل على أيد وزيره بالاتفاق مع ولى العهد و بعدها كانوا هيقتلوننا لولا واحد من رجال الفرعون المخلصين ساعدنا على الهرب و بعدها رجال الوزير خربوا المحطه العلميه.

روگش: و آيه الى حصل لباقي أفراد البعثه؟

بُورسك: ميران رئيس البعثه أتوفى من ربيعيت سنه و أنا أتزوجت من الطبيبه خُناف و المهندس نُوزين و الضابط كُوجر و خُناف و أنا متنكرين و بنشتغل و عايشين وسط البشر حالياً.

كَدَز بنبرة إحتقار: بتشتغلوا مع الأغبياء دول.

بُورسك: هو ده كان الحل الوحيد علشان نفضل وسطهم طول الفتره دى، ممكن أعرف مين السيد.

روگش: ده السيد ....

كَدَز مقاطعاً: أنا القائد كَدَز نائب القائد الأعلى للجيش.

بُورسك: أعتذر يا سيدى ماكنتش أعرفك، آيه الى أخرجكم فى الرجوع لينا كل المده دى؟

روگش: بعد ما رجعنا للكوكب الحرب بدأت بينا و قبائل الهمج، و القبائل سرقوا بعض اسلحتنا المتطوره و ده أتسبب فى أن الحر تطول كل المده دى و أخيراً رجعنا علشان نرجعكم الكوكب.

كَدَزْ مَقَاطِعاً: بس في مشكلة، سفينه الفضاء الى جينا فيها  
أعطلت بعد هبوط أضراري وسط الصحراء و هحتاج  
نصلحها.

بُورسك: أستاذنكم ثواني، ثم يوجه كلامه إلى الضابط وينظر  
له بنظره جعلت عينيه تحولان: أنت طبعاً عايز تروح  
تفضحنا و تقول الحق الفضائيين أهم صح، لو عملت كده أنا  
مش هقتلك أنا هسيبك لان الى زيك حاولوا كثير و مقدروش  
يثبتوا أننا فضائيين عارف حصلهم أيه نصهم اتجنن و النص  
التاني مات منبوذ آخرهم الدكتور حجاج عالم الفلك عارفه،  
دلوقتي بقي أنت حر لو فكرت تعملها.

يضغط بُورسك على زر في المسدس فتحرك الضابط من  
مكانه و نظر نظرة أندهاش لبُورسك و الباقيين: أنا ... أنتو  
... أنا مش هقول حاجه بس سيبوني في حالي.

نظر بُورسك للضابط في عينه مباشرة: أنت حر أنت الى  
هتجيبه لنفسك، اسيبك بقي لشغلك لحسن هنعطلك.

و بوجه تعلوه ابتسامه خُبت انسحب بُورسك هو و الآخرين  
ليترك الضابط يغرق في حيره و يكاد يُجن أن لم يكن جن  
بالفعل.

(٥)

## لم الشمل

أتجهت المجموعه إلى منزل بؤرسك، ما أن دخلوا حتى  
رحب بهم نُوزين و خُناف، و كانت خُناف قد أعدت لهم  
طعام الغداء على الطريقه البلوتوسيه حيث أعدت ثعابين  
مشويه على الفحم و شربة سحالي بالبهارات مع سلطة كبد  
الضفادع، و بعد أن أنتهوا من الطعام بدأ نقاش حول كيفية  
أصلاح سفينه الفضاء فقال نُوزين: الاول عايزين ننقل  
السفينه على عربيه نقل كبيرة للمخزن بتاعنا.

بؤرسك: و هنجيب العربيه دي منين انت عارف السفينه دي  
نوعها ايه؟

بؤرسك موجهاً سؤاله لروكش: أيه نوع السفينه الى جيتوا  
فيها.

روكش: من نوع النجم الاصغر ال....

يقاطعهم صوت الباب و دخول كُوجر و هو يقهقه و يتحدث  
فى تليفونه المحمول: أموت فيك أنت يا شعبي يا منحرف  
خلاص نتقابل بليل أجيب بيره ولا عندك ههههه أه يا سفله  
سلام.

استمر كُوجر يقهقه إلى أن وصل إلى مكان جلوس الجميع  
فنظر لهم و توقف عن الضحك: مين دول؟

كُوجر يبدو بمواصفات البشر كأنه شاب فى الثلاثين ذو  
شعر أشقر و عيون زرقاء و مظهره يدل على أنه شاب  
لاعوب.



يقف كَدَز و ينظر له: هو ده الظابط كُوجِر؟  
كُوجِر: مين الأستاذ شكله مش غريب على؟  
يتنحج بؤرسك محاولاً تنبيه كُوجِر: ده السيد كَدَز نائب القائد  
الأعلى للجيش.

يذهل كُوجِر ويؤادى التحية العسكريه بحماس: سيدى القائد.  
كَدَز: أنت الظابط المسئول عن أمن البعثه، مين الفاشل الى  
أختارك للمهمه دى؟

كُوجِر بأبتسامه خبث: السيد قائد الحرس أخوك الصغير.  
يحاول الجميع أن يكتموا ضحكاتهم فيتكلم كَدَز و هو يحاول  
أن يخفى غيظه: هيثم محاسبته على سوء اختياره.  
يتدخل روگش بأبتسامته المعتاده محاولاً تهدئة الموقف: مدام  
خُناف مفيش عندك أى عصاير بارده الجو حر جداً هنا.  
خُناف بأبتسامه خفيفه: حر ده أحنا كده فالشتا أومال لما  
تشوف الصيف هتعمل أيه، أنا هقوم أجيبلكم حاجه علشان  
الضغط.

نوزين محولاً إعادة الحديث إلى مساره: يا جماعه نروح  
نجيب السفينه بتاعتنا الأول و نخزنها فى المخزن.  
بؤرسك: تمام يبقى تروح تجيب العربيه و تقابلنا هناك.

(٦)

الخاتمه

بالفعل انتقلت المجموعه إلى مكان هبوط سفينة الفضاء، كما وصل نُوزين و معه السياره النقل التي سوف ينقلوا بها السفينة، و كان هناك مفاجاة تنتظرهم، لقد أختفت السفينة، حاولوا أن يتأكدوا من مكان السفينة إلا أنهم فقدوا كل اتصال بالسفينة، هنا بدأ كُوجر كمسئول عن أمن البعثه أن يبحث و يحقق في أختفاء السفينة، و بعد يومين من البحث و التحقيق، جمعهم كُوجر و قدم لهم تقريره عن أختفاء السفينه: أنا بعد ما دورت و بحثت و أستقصيت و .....

كَدَز مقاطعاً في عصبية: وصلت لأيه بأختصار أنا صبرى بدأ ينفز.

كُوجر بلهجه بارده: براحه بس عشان أنت راجل كبير بدل تقع مننا، المهم السفينة أخذها تاجر خرده كبير أسمه الحاج عبدالغفور البراعى، الراجل أخذ السفينة.

روكش مستفهماً: هل تعنى أنها عند هذا الرجل، أذن لماذا لا نذهب و نسترجعها؟

كُوجر: هو فى مشكله واحده بس.

بُورسك: أيه الحاج ده عايز فلوس يعنى؟

كُوجر: لا الحاج ده فكك السفينة وباعها خرده.

بُورسك بتوتر: أنت متأكد.

نُوزين فى هلع: يعنى أيه هفضل هنا علطول أنا عايز أشوف ولادى قبل ما أموت.

يُمسك به روگش محاولاً تهدئته، أنهارت خُناف و بدأت تبكى، و بدأ كَدز يسب و يلعن، حاول روگش أن يُهدئ الموقف: متقلقوش القيادة أكيد هتبعث سفينه تانيه تدور علينا فى حال تأخرنا شهر.

بُورسك بحدده: أنت عارف شهر يعنى أيه بتوقيت الأرض، يعنى خمسه وتلاتين سنه فاهم يعنى أيه.

نوزين فى هلع: آخر مره سمعت الكلام ده فضلت ع الأرض دى اربعتلاف و ربحميت سنه لا أنا عايز أشوف ولادى عايز أرجع كوكبى.

ثم أنفجر نوزين بالبكاء، بدأ بـُورسك يستعيد هدوئه و قال فى محاولة لتهدئة الموقف: عموماً يا جماعه نهدي الوقت مش كبير و بعدين أستحملنا كل ده مش هنقدر نستنى الشويه دول، المهم دلوقتى أن السيد روگش و السيد كَدز لازم نوجد لهم وظائف للتخفى بين البشر، موجهاً كلامه لروگش: أنت دراستك الأكاديميه كانت أيه يا سيادة الوزير؟

روگش: أنا درست الأستنساخ.

بُورسك بتعجب: الأستنساخ ده هنعمل بيه أيه هنا، عموماً ممكن تشتغل فالطب ولا أيه؟

روگش: أدرس التشريح البشرى و أبدأ.

يوجه بـُورسك سؤاله إلى كَدز: و سيادتك درست أيه.

كَدز بتفاخر: درست التخطيط الأستراتيجى فى الأكاديميه العسكريه إلى جانب خبراتى العسكريه طبعاً.

بُورسك: تمام نشغلك خبير أستراتيجى.

كَدز: و دول أيه شغلهم بظبط.

بُورسك: لا بسيطه دى شغله حلوه أوى بيشتغلوا عارفين فى  
كل حاجه و أى حاجه.  
كُوجر: تمام و أنا هبدأ أجهز أوراقهم علشان يقدرُوا يشتغلُوا.  
نُوزين بأستسلام: نفس الكلام الى سمعته المره الى فاتت منكم  
لله منكم لله.  
يغادر نُوزين الغرفه، تقف خُناف و تقول بنفاد صبر:  
ضيعتوا وقتى أنا هقوم أشوف أطبخ لكم أيه بكره.  
كُوجر: أنا هروح أقابل المزه بتاعتى.  
بُورسك: و أنا هروح أنام علشان عندى شغل بدرى بكره.  
ما ان خرج الجميع تحدث كَدز لروكش فى أنفعال وهو يكاد  
يغلى: أول ما نرجع الكوكب فكرنى إنى إقدم كل الى أختارُوا  
أعضاء البعته المجنونه دى للمحاكمه و أعذب أخويا و  
أطرده من الخدمه علشان أختار كُوجر.  
روكش مبتسماً: حاضر ده لو رجعنا.

- تمت -